




BIBL. NAZ.
Vitt. Emanuele III

SUPPL.
PALATINA

C

180

NAPOLI



1058.

app - Palot (160)

626.755

EPISTOLA PASTORALIS

AD CLERUM

ET

POPULUM LARINENSEM



ROMAE 1829
APUD JUNCHIUM ET SOC.
Praesidium facultate.



X 3 X
VINCENTIUS LA ROCCA

SACRAE THEOLOGIAE DOCTOR

DEI, ET APOSTOLICAE SEDIS GRATIA

EPISCOPUS LARINENSIS

*Venerabilibus Fratribus, et Amantissimis in Christo Filiis,
Dignitatibus, Canonicis, Parochis, utrique Clero, Vir-
ginibus Sacris, Ordinibus, Populoque Dioecesis Suae,*

PACEM, ET SALUTEM A DOMINO SEMPITERNAM.

Sola Dei misericordia, et Apostolicae Sedis gratia ad praesentationem Religiosissimi Regis Nostri Francisci I.ⁱ, quem Deus semper sospitet, ad Larinensem Episcopatum assumptus de mea ad tantum opus imparitate loqui operae praetium non existimo. Scriptum est enim: *quod potest Deus de lapidibus suscitare Filios Abbrae: ideoque in Domino speravi; et non confundar. In manibus Domini sortes meae.*

Vos autem ipsi tenuitatem meam cognoscitis; et cum Anno millesimo octingentesimo decimo septimo Sa: Me: Pii Papae Septimi Pontificis Maximi Apostolica mandata exequabar, vos verba mea audistis, et ego lenitatem, et docilitatem vestram cognovi. Usque ab eo tempore condolebar *eis, qui ignorant, et errant; quoniam et ipse circumdatus sum infirmitate.*

Non mitter igitur ad Populum ignoti sermonis : *Cognosco oves meas , et cognoscunt me meae .* Vos omnes , et singuli vidistis meam indolem , ingenium , mores . Cum advena essem inter vos , Deo adjuvante , pro salute Animarum , quas Jesus Christus suo sanguine redemit , laboravi : nunc vero cum missionem Apostolicam , characterem Episcopatus , et Spiritus Sancti charismata , ut in Domino confido , recepi , paseam in corde meo gregem meum , quaeram ovem , quae erravit , ac meis impositam humeris reducam , curabo infirmam , et Dei auxilio mortuam suscitabo .

Qua de re Vos primum alloquens praestantes Dignitates et Canonici Cathedralis Ecclesiae Larinensis , quos gaudium , et Coronam meam appellabo , vos qui optimam partem elegistis , illam nempe adstandi ante Altare Dei ut Seraphim in Caelis , psalmisque , et Canticis Sancto Sanctorum assiduas laudes persolvendi , hoc a vobis exoptat Episcopus vester , ut quemadmodum honore , ita et virtutum specimine caeteros de Clero praeceletis . Vel de hoc tantum vos rogo , ut quotidiana psalmodia vestra talis sit , quae ad *Thronum Dei cum odore suavitatis ascendat semper .* Mementote sacras preces non deprecantibus tantum ; sed et caeteris multum prodesse : scriptum est enim *Orate pro invicem : multum enim valet deprecatio justis assidua .* Mementote insuper quod praecipua Ecclesiae militantis propugnacula sint praeces publicae , et *Juge sacrificium .* Tandem omnem eorum mecum impendite in administratione Dioecessana , Sacri Seminarii , Confraternitatum , ac Locorum Piorum publicae beneficentiae . Cavete ne propter avaritiam super Vos cadat Aeterni maledictio : *conederunt sacrificia mortuorum , multiplicata est super eis ruina .* Ad majorem ergo Dei gloriam Seminarii Alumnorum Ecclesiasticorum , Hospitalis Pauperum infirmorum reparationi , consulamus : Mecum

etiam accurrite, ac collaboratores mei estote in providendis Puellis praesertim periclitantibus, in pauperibus Adolescentibus ad bonam, et Christianam frugem informandis, ac denique pro Domus Dei, et pro humanitatis, et publicae Salutis cura in restauratione collabentium Sepulcrorum.

Vos vero Sacri Animarum Pastores, quorum sollicitudini multae Gregis partes commissae sunt, mementote quod vestrum sit quam plurimas hosti illi maligno, et veterinoso praedas auferre. In hisce speciatim temporibus, in quibus falsa quaedam Philosophia perniciosa dogmata spargens homines a recta semita ad veram trahit perditionem: Maximum profecto est infortunium effrenata illa proclivitas imitandi exempla, mores, et linguam ultra Montium advenarum. Proh Deus Immortalis! Quantae iniquitates alienae, cum aliena lingua ab incautis fuerunt degustata! Ecclesiae igitur lacrymas de multorum filiorum lapsu detergite, illos miseros relevate, debiles confortate, superbis resistite, vigilantia, prudentia, saeroque divini Verbi pabulo omnibus praesto estote.

Pari modo Vos Sacerdotes, et Levitae. Vosque electi Dioecesis Alumni Seminarii, qui in quadam veluti sacra palaestra ab ineunte aetate exercemini; praec oculis habetote, quod Populi Christiani bonum pendet a Clero. Ante oculos habete, quod statuit Sacrosanctum Concilium Tridentinum *de vita, et honestate Clericorum*. Otium igitur vitate: Cor enim enervat, atque hebetat spiritum. *Attendite diligenter lectioni, exhortationi, doctrinae, et Sacrorum canonum observantiae: Sic enim salvos facietis vos, et eos, qui vos audient.* Cui quidem doctrinae, de qua hic loquitur Apostolus: si pro viribus operam navabitis, sublimis adeo sacrae militiae, cui addicti estis in mentibus vestris idea exurget; ut ne dum cuilibet oneri subeundo, ad quod

vocabit vos Deus, idoneos, expeditosque vos reddet; sed vestros quoque ita diriget actus, ut si verba, et exempla vestra Sectatoribus Saeculi inania futura sint; efficient tamen, ut illi *obmutescant*; atque ita saltem Religionis Jesu Christi decus, sartum tectumque custodiat (*).

At vos Sacrae Virgines, eo quia a Mundi consortio, et periculis sejunctae numquid vobis tantum elaborabit? Nequaquam. Dilectissimae in Domino filiae. Nam Vos de militanti Christi Ecclesia estis, quin et illustriorem in ea tenetis locum. Studendum igitur Vobis est, ut Mundo, quem reliquistis, magis magisque per fidelem Regularum observantiam commoriāmini: dein cum fiducia ad Coelum manus extollite. Nam cum Sancta Dei plebs inter strepitus. Terraeque angustias suos ad Caelestem Patrem clamores efferet, illa profecto a Secretis gemitibus, suspiriisque vestris potenter juvabitur: *adjuvant enim Sanctae Plebis clamores, suspira, et gemitus Columbarum*.

Vos e contra, qui sub Divi Francisci stemmati nomina dedistis, Sacri Coenobitae, quos tamquam Speculatores Sanctarum Ecclesiae Turrium posuit Deus, fervorem vestrum excitate, vigilasque renovate nunc temporis vel maxime, in quo humanae stirpis terribilis hostis tantas sibi parat latebras, atque recessus. *Ponite igitur corda vestra in virtute ejus, et distribuite domus ejus, ut enarretis in progenie altera*.

Similiter ad vos sermonem convertam Optimates Amplexus Magistratus, et Civium Ordines Universi, rogaus vos, atque obsecraus, ut *alter alterius onera portetis*, et

* Hoc tam necessarium opus fuit Ecclesiarum Statuta ad normam ultimarum Bullarum Pontificis Pii VII. Impensa qua praesentium sollicitudo a Pio nostro Rege L. M. Ferdinando I. impetrata Anno 1799. cum solidali cura Filii Piusalmi Francisci I. pro observantia Instituti S. R. T. praesentibus, de Ecclesiis receptis, et Patrimonialibus, Ritus naturae potius sunt omnes Ecclesiae Nostri Regni Divini Cultui, nimirumque salutis diestae.

sic uniuscujusque onus levius fiet. Qui enim vel sanguinis nobilitate, vel munerum splendore clarescit, quo magis virtutum exercitio praestabit, eo plus in inferioribus aedificationem effundet. Qui vero majorem Populi partem constituit, quo majus sobrietatis, docilitatis, modestiaeque vestra experimenta exhibebitis, eo majorem apud Deum gratiam comparabit; ut eos, quos ad regimen vestrum elegerit, prudentia, charitate, zelo, et justitia instruat abundantius.

Nec vos silentio praeteribo Patres, Matresque familias, quibus curam concedidit Deus educandi, atque excolendi Filiorum Animas, quas redemit Sanguine Suo, Vos, quibus commissum est in parvulorum cordibus prima virtutum, fideique semina instillare: ne, quaeso, unquam dulcis hujus muneris vestri obliviscamini, sanctificandi scilicet Vos ipsos in sanctificandis liberis operam dando: Parens enim, ait, Divus Paulus *Sanctificabitur in filiis*. Ut hoc vero assequamini, quam pro eorum mortali vita impenditis curam, eandem saltem pro spirituali, et aeterna impendatis necesse est. Copiose autem vos ipsos alite divini verbi pabulo, Sanctis nempe Cathechesibus, caeterisque piis instructionibus, quae numquam Vobis deerunt, et quibus, Deo opitulante, per quam sedulam navabo operam.

Insuper Vos omnes Charissimi meae curae Pastoralis concediti oro, atque obsecro, ut hisce temporibus a falsis Philosophis caveatis; qui non sophi, sed sophisti jure merito appellantur. Cavete etiam a falsis Prophetis, quorum ingens est numerus, quique *Dei nostri gratiam transferentes in Luxuriam*, ad planas, florescentes, mollesque percurrendas vias doctrinis, et exemplis blandiuntur. *Est via quae videtur homini recta, novissima vero ejus ducunt ad mortem.*

Tandem preces mecum Deo Optimo Maximo fundite pro SSiño Pontifice Nostro Pio Papa VIII., ut ipse salvum, et

(8)

incolumem custodiat, et conservet pro totius Christianae Reipublicae bono.

Et pro piissimo Rege Nostro Francisco I., et Religiosissima Regina Nostra Elisabeth, et tota Augustissima Regia Familia; ut Deus, et Dominus noster ab omni adversitate servet incolumes, adiciens annos eorum usque in generationem, et generationem.

Vobiscum sit Pax; et Gratia Domini Nostri Jesu Christi in Spiritu vestro.

Dabam Romae extra Portam Caelimontanam ipso die Consecrationis Nostrae.

NIHIL OBSTAT

D. Paulus Del Signore pub. Prof. Cons. Theol.

IMPRIMATUR

Fr. Joseph Maria Velzi Sac. Pal. Ap. Mag.

IMPRIMATUR

Joseph Dellà Porta Patr. Const. Vicar.

626755

